

二支

一百五十五

永樂大典

卷一千三十三

ID 34056 6

永樂大典卷之一千三十三 二支

兒

小兒證治六十六

小兒衄血

論

巢元方病源鼻衄候。小兒經脈血氣有熱喜令鼻衄。夫血之隨氣循行經脈。通遊腑臟。若冷熱調和。行依其常度。無有壅滯。亦不流溢也。血性得寒。即凝澀結聚。得熱即流散妄行。小兒熱盛者。熱乘於血。血隨氣發溢於鼻者。謂之鼻衄。凡人血虛受熱。即血失其常度。發溢漫行。乃至發於七竅。謂之大衄也。孫思邈千金翼方脈浮發熱。口乾鼻燥。能食者即衄。聖濟總錄論曰。小兒體本挾熱。舍於經絡。血脉揚溢。則為鼻衄。蓋血與氣循行經脈。通於府藏。邪熱乘血。血得熱則妄行。隨氣上溢。出於鼻者。為鼻衄。血虛受熱。散漫失度。出於七竅者。為大衄。鄭端友全嬰方。夫鼻衄者。是五藏熱結所為也。血隨氣行。通流臟腑。冷熱調和。不失常度。無有壅滯。亦不流溢。血得寒而凝結。得熱而流散。熱乘於血。血隨氣發溢。出於鼻竅也。又有因傷

寒溫疫。諸陽受病不得其汗。熱毒停聚五臟。故從鼻而出也。衄血立効。
沈氏子十歲。鼻衄不止。召二三醫。或以茅花煎湯。或以犀角地黃湯。并龍
骨末吹鼻。數法皆不効。其血注下。召愚視曰。急以濃鹽水下。龍膽丸一服
減半。再進全除。主人曰。鹽水有何効。愚曰。夫血得熱而流溢。鹽水鹹冷。能
凝其血。譬之屠猪就血。得鹽水而凝結。黃連龍膽味苦寒。能堅其血。所以
知其鹹苦入口。即立効也。栖真子嬰童寶鑑。小兒心熱。肺氣實。血隨熱入
肺經。為鼻衄。惠濟論。小兒鼻衄。候歌。欲衄之候。脉弦洪。鼻中乾燥。響如風。
氣衝積血。停留肺臟。腑煩冤邪。脉攻。數合出紅。猶可治。更加升斗。命須終。
明師若欲知調治。涼血清膏始有功。清膏。清肺也。

方

葛洪肘後備急方。療人少小。亟鼻衄。小勞輒出。

右用桑耳無多少。熬令焦。擣下篩。每衄發。輒以杏仁大塞鼻。數度即
可斷。外臺法。燒用為丸。以內亦得。

仙人水鑑方。小兒百日内。鼻中出血方。

葵花一字急吹之。白礬水浴更相宜。此是鼻風不消藥。莫教虛誤
妳頭兒。

外臺古今錄驗方療小兒鼻衄不止

以馬屎綿裹塞鼻孔中

又方

燒髮灰末吹鼻孔中亦佳。本草聖惠。嬰孺法同甚妙

又方

單服白馬屎汁。三合甚良

太平聖惠方升麻散。治小兒鼻衄。或唾血

川升麻 半兩

羚羊角屑

甘草 炙微赤剉黃芩

赤芍藥

已上各一分

右件藥。搗鹿羅為散。每服一錢。以水一小盞。入淡竹葉七片。煎至五分。去滓。入地黃汁半合。更煎一兩沸。不計時候。量兒大小。分減溫服。生地黃煎。治小兒鼻衄不止

生地黃 半斤。取汁

刺薊 半斤。取汁杏仁 一兩。湯浸去

皮尖雙仁。麩炒黃別研

阿膠 半兩。搗碎炒令黃燥為末

蜜 一合

右件藥。都入銀鍋中。以慢火熬為膏。不計時候。用新汲水調下一錢。

量兒大小。加減服之。

又方

刺蘘 半兩

亂髮灰 一分

蒲黃 半兩

右件藥。搗細羅為散。每服以冷水調下半錢。不計時候。量兒大小。加

減服之。

桂心散。治小兒鼻衄心悶。

桂心 一分

亂髮灰 一分

乾薑 半分。炮裂剉。

右件藥。搗羅為散。不計時候。以冷水調下半錢。更隨兒大小。以意加

減。

梔子仁散。治小兒卒熱。毒氣攻腦鼻衄。

梔子仁 一兩

槐花 半兩。微炒。

右件藥。搗細羅為散。不計時候。用溫水調下半錢。量兒大小。以意加減。

又方。治小兒鼻衄不止。

亂髮灰 半兩

伏龍肝 一兩

右件藥。都研令勻。不計時候。以新汲水調下半錢。量兒大小。以意加

減。

又方

刺薊汁一合 地黃汁一合 生薑汁少許

右調和令勻。徐徐服半合。仍將滓塞鼻中。即差。

又方

炒桑耳令焦。熟擣細羅為散。不計時候。以冷水調下半錢。亦吹少許於鼻中。量兒大小。以意加減。

譚氏殊聖方。小兒鼻衄數還啼。顏色青黃。漸改移。忽爾發時。饒奔躁。連忙走起。索東西。只緣積熱。三焦壅。凝水川消。貝母知。更有荷衣煎五合。蜜調頓服。定無疑。

凝波散 聖濟總錄。名玉屑散

寒水石

貝母

知母 為末。各一分半

馬牙硝 細研。川消亦得。各一分 荷葉 一兩。以水一升。煮五七沸。曬

乾。焙亦得

右為末。每服半錢。蜜水調下。

絳雪丹治小兒陽毒煩躁。吐血衄血。漸生赤斑。

丹砂 研半兩 焰消 研一兩

右二味各研令細。再同研。鍊蜜和丸如梧桐子大。每服一九。沙糖水調化服。取下涎即安。

張渙醫方妙選抵聖散。治不以疾病鼻衄不止。

盆硝研

亂髮灰燒灰研紅藍花取末各一分

右用研勻細。以綿纏搵藥塞鼻中。湯調下。

槐花散。治衄血。

槐花一兩炒

蒲黃半兩

川麴薑一分

右件搗羅為細末。每服半錢。新水調下。

張銳雞峯方治衄血。

右每用石榴花末。一字許搗鼻內。

又方

每用龍骨末。少許吹鼻中。

惠眼觀證方調榮散。治衄血不止。

血餘父母首上者一團。用綠竹筍殼一片裹燒過。

右為末。每服半錢。或一錢。新汲井華水下。已上二方載切切新書。

鄭端友全嬰方龍膽丸。治小兒衄血不止。

黃連

龍膽草

右等分爲末。糊丸如小豆大。三歲三十九。或作散子以濃鹽水送下。三黃丸亦效。一方研好墨滴鼻中。一方燒亂髮吹鼻內。茅花湯亦得。青苔散。治小兒鼻衄吐血。亦治淋瀝。小便不通。

右以船底青苔。日乾爲末。三歲一錢。藕節汁入蜜少許調下。淋瀝。木通湯調下。

檿皮散。治小兒衄血至一二升悶絕。

檿皮一兩

梔子一兩

甘草炙半兩

右咬咀。三歲一錢。水半盞。煎三分。去滓服。一方剪金花莖葉陰乾。水煎服。又一方。白芨末水調塗鼻上。并顛門立止。又一方。草麻葉塗油炙熱熨兒顛上血止。

膠黃散。治小兒大衄口鼻耳出血不止。十五六歲兒陽盛多此病。

阿膠一兩炒

蒲黃半兩

右爲末。三歲半錢。生地黄汁微煎調下。以帛急繫兩乳頭。隨血左右。

兩竅俱出。竝繫兩乳

又方

爛寒水石煨

牡蠣煨

右等分爲末。三歲半錢。冷水調下。連進二服。一方人中白燒灰爲末。吹鼻立止。一方青竹茹燒灰。入麝香吹鼻竝效。一方蒜去皮研細。攤餅子如錢大。厚一豆許。左鼻出血。貼左足心繫定。右亦如之。兩鼻出血。兩脚如之。血止急洗去。

又方。治衄。釜底墨。吹鼻即止。

吉氏家傳黃藥散。治小兒鼻衄不止。

右黃藥一味爲細末。每服半錢。或一錢。井水調下。載幼幼新書

李櫟小兒保生要方治鼻衄。滑石爲細末。右用飯爲丸。如蘿蔔子大。每服三五十粒。微嚼破。新水嚥下。未能嚼者。槌碎與之。

又方

生蘿蔔 細研取汁

右入酒相當量。兒大小。溫溫與之。立止。

湯民望嬰孩妙訣。此候乃血熱不循經。而壅從鼻出也。血隨其氣。而肺主氣。外屬鼻。故自鼻出而衄。春冬衄者。只用生地黃細研取汁。加生蒲黃少許。砂糖井水浸服之。愈。秋夏鼻衄。但用車前草一握洗淨。研取自然汁同。

生薑一處研取汁。入生蜜一匙。先用滓塞兩鼻。次用新汲井水和蜜。并車前草薑汁飲之即愈。凡有此候。皆由榮熱。宜服涼血地黃湯。

地黃湯。治榮中有熱。及肺壅鼻衄。生瘡。一切丹毒方。

生地黃

赤芍藥

當歸去蘆頭洗淨

川芎各等分

右件咬咀。水煎去滓。大小以意加減。鼻衄臨熟入生蒲黃少許。生瘡遍體。加黃芩一處等分同煎。丹毒加防風去蘆等分同煎。用之累驗。

又方

右用生蘿蔔取根。搗自然汁。仰頭滴入鼻管中取止。次以新汲井水和薑蜜蘿蔔汁飲之良。

又方

右用車前草葉一握。生薑一塊切研。取自然汁入蜜。新井水調和飲一盞許。仍用滓塞鼻中即止。

袁當時大方治鼻衄。吳提舉傳。麝茅紙裹乾馬糞。塞鼻中即止。

演山省翁活幼口議治小兒心肺蘊熱。及心血妄行。鼻衄出血不止。良方。

右將故紙藤被一片。作撚子包麝燒熏入鼻。或吹入鼻中。又令患人

吸呷尤佳。故藤紙被至舊亦得。或燒內小瓶中留性。每服二錢。入麝酒調服極妙。

小兒吐血

論

巢元方病源吐血候。小兒吐血者。是有熱氣盛而血虛。熱乘於血。血性得熱。則流散妄行。氣逆即血隨氣上。故令吐血也。聖濟總錄論曰。小兒陽氣盛壯。上焦有熱。伏於肝心二臟。播流脉中。血得熱則妄行。下入胃中。胃受之則脹滿。與氣俱上。衝擊。故令吐血。錢乙小兒方論補下不同云。段齋郎子四歲。病嗽身熱。吐痰數日。而咯血。醫以桔梗湯。及防己丸治之。不愈。其涎上攻。吐喘不止。請錢氏下。編銀丸一大服。方見痰涎門中復以補肺散。補脾散治之。方見胃氣不和門中今段氏咯血肺虛。何以下之。曰。肺雖咯血。有熱故也。久即虛痿。令涎上潮而吐。當下其涎。若使不吐涎。為甚便也。蓋吐涎能虛。又生驚也。痰實上攻。亦使發搐。故依法只宜下痰。後補脾肺。心涎止而吐愈。若先補其肺。為逆。先下其痰。為順。先下後補。為良也。鄭端友全嬰方病差後。唾血咯血下血者。此熱毒積瘀。犀角地黃湯主之。福病亦宜服。夫吐血者。由榮衛氣逆也。榮者。血也。衛者。氣也。榮衛相濟。不失常。

道。一有所勝。則致妄行。血者水也。決之東則東流。決之西則西流。氣之使血。其勢如此。巢氏云。吐血者。是有熱氣盛而血虛。熱乘於血。血性得熱。則流散妄行。氣逆則血隨氣上。故令吐血也。又或飲食大飽之後。脾胃內冷。不能消化。忽吐所食之物。氣血相衝。因傷脾胃。亦令吐血。若久嗽氣逆。面目浮腫而嗽吐血者。是肺虛損也。嗽部有方。曾世榮活幼心書。小兒九道出血。何爲而然。蓋人之所有者。血與氣也。心者血之主。肺者氣之主。氣主响之。血主濡之。榮養百骸。灌溉孫脉。升降上下。榮衛諧和。自然順適。一或不調。疾由生矣。或外爲六淫所侵。內因七情所汨。氣乃留而不行。血乃壅而不濡。內外抑鬱。不能流注。以榮於身。必有妄動之患。叔和以芤脉爲失血之義。在七表屬陽故也。陽明主乎多氣多血。未有不因熱而得。蓋氣血俱熱。熱鬱內逼。失其常度。是以妄行。有在襁褓患此證者。固非七情所傷。皆因乳母執着。不自寬釋。及啖辛辣之味。流於乳絡。兒飲之後。停滯不散。鬱蒸於內。亦能動血。或居重帷暖閣。火氣熏逼。不令常見風日。積溫成熱。熱極則湧泄。或吐或衄。或大小腑亦多血來者。有氣虛而邪熱乘之。則血不得循流。故道滲於諸經。亦生走失之證。其面眇白。脉沉微。血淡紫。口氣緩是也。又况嬰孩脆弱。易虛易實。因熱內攻。血隨氣行。或壅而上。

逆。或下而忘返。遂有吐血。衄血。瀉血。溺血之證。然而血不自動。因氣使之。風不自生。因熱而起。由是而論。可以類推。治法先明虛實。審得病源。隨經施治。藥餌無差。不失其機要。實則小柴胡湯加生地黃。絲茅根。或苦參亦好。竝用水煎服。或哎咀五苓散合五和湯。亦加絲茅根。苦參煎。及投消毒飲。次用局方雞蘇丸。三黃丸間服。虛則理中湯。及人參芎歸湯皆可服。間有醫者。見其血盛。以為熱極。過投涼劑。遂使血寒不能歸源。而妄流。其色紫黯而凝滯。或成小塊。當服薑附之劑以溫之。自然流暢。毋致妄行為佳。栖真子嬰童寶鑑小兒吐血歌。血為榮兮氣為衛。二氣相隨無住滯。忽然出被氣來侵。所以忘形不依位。血隨氣上奔心來。吐下如屠爭忍視。便須服藥好看承。解熱須令依次第。鄭端友全嬰方吐血氣逆詩曰。血虛氣盛不和同。熱毒流心引肺風。忽爾氣虛榮衛逆。吐出鮮明點點紅。曾世榮活幼心書失血詩曰。九道何為血妄行。蓋因抑鬱熱邪生。隨經施治明虛實。氣順如常血自勻。

方

孫思邈千金要方治小兒吐血。燒蛇蛻皮末以乳服之。并治重舌。又方。取油三分。酒一分。和之。分再服。

簡要濟衆方治小兒吐血不止

右蒲黃細研。每服半錢。用生地黃汁調下。量大小加減進之。

治小兒吐血不止

右用黃連一兩。去須擣為散。每服一錢。水七分。入豉二十粒。同煎至

五分。去滓溫服。量兒大小加減進。已上二方。出切切新書

太平聖惠方犀角散。治小兒四五歲已上。非時吐血。

犀角屑

梔子仁

生乾地黃

子苓

紫參

刺薊各一分

右件藥。擣麤羅為散。每服一錢。以水一小盞。煎至五分。去滓不計時候。溫服。量兒大小。加減服之。

蒲黃散。治小兒吐血不止

蒲黃一分

伏龍肝半兩

亂髮灰一分

右件藥同研令勻細。不計時候。煖生地黃汁調下半錢。量兒大小。加減服之。

茜根散。治小兒吐血。心躁煩悶

茜根半兩

犀角屑

川升麻

川大黃剉微炒

黃芩

甘草炙微赤剉已上各一分

右件藥搗鹿羅為散。每服一錢。以水一小盞。入黑豆三十粒。淡竹茹半分。煎至六分。去滓不計時候。量兒大小。以意加減溫服。

又方

刺薊自然汁。不限多少

右件藥取汁一合。煖令溫。不計時候調下。玄明粉半錢。量兒大小。以意加減。

又方

右取生地黃汁一合。煖令溫。調下。麩塵半錢。不計時候。量兒大小。以意加減服之。

又方

右以亂髮燒灰細研。每服以溫水調下一字。

嬰孺方治少小欬唾中有血。欬冬湯

欬冬花

乾薑

阿膠炙各二兩 吳茱萸一升

桂心五寸

艾一雞子大

鯉魚一箇長一尺二寸

右杵細。酒和置魚肚中。銅器中蒸熟取汁。大人服一升。小兒一合。以

意裁之

豚肺散。治少小欬逆甚者。血出鼻衄

右以豚肺。好酒浸一宿。平旦取炙乾為末。一服一撮飲下

升麻湯。治小兒熱病鼻衄。或唾血

升麻 八分

淡竹青皮

羚羊角 各五分 生地黃 七分

甘草 四分

芍藥 六分

右以水三升。煮一升。一歲兒為三服

治小兒汗出如漿。衄血吐血。小便出血垂死者

都梁香

乾地黃 各二兩

紫苑

桂心

人參

青竹葉

菴蓉 已上各一兩

右為末。酒服方寸匕。日進三服。夜一服。可至二七。四方載切切新書

聖濟總錄黃連飲。治小兒心肺有熱吐血

黃連

去鬚一分 豉 二百粒

右二味。將黃連麤擣篩。每服半錢匕。水七分。入豉二十粒。同煎取三

分。去滓溫服。日三。更量大小加減

治小兒吐血不定方

刺薊自然汁不計多少

朴消半兩

右二味先研朴消為末。二百日兒及晬兒每服用刺薊汁調朴消末一字。至半錢。七日再服。更量大小加減。

大黃湯治小兒吐血

大黃剉炒

黃芩去黑心各一分

右二味麤擣篩。三四歲兒每服一錢。七水七分。入黑豆三十粒。同煎至四分。去滓溫服。日三。更量大小加減。

治小兒積熱攻肺。卒吐血

飛羅麩

二兩

生地黃汁二盞

右二味相和勻。暴乾研為末。每服半錢。七新汲水調下。日三。隨兒大小加減。

又方

刺薊花

暴乾不拘多少

右一味擣羅為末。每用黃牛乳調下一錢。七日三。

地黃飲治小兒吐血

地黃

一升。研取自然汁

右一味。一歲兒服半合。二三歲每服一合。量兒大小增減。日三。張渙醫方妙選。謹按小兒內有邪熱。流散妄行。若氣逆。即血隨氣上。或口中吐血。鼻中衄血。今有經効方治之。紫參散。治吐血病。

紫參一兩

山梔子一兩

生乾地黃一兩

刺薊一分

燒灰

亂髮一分

燒灰

已上搗羅為細末。次用

蒲黃一分

伏龍肝一分

竝細研

右件都拌勻。每服半錢至一錢。煎竹茹湯調下。

張銳雞峯方治吐血

右用伏龍肝末。每服二錢。水一盞。同煎至六分。去滓溫服。不以時

治吐血。衄血

右用白茅花。每服秤一錢。水一盞。同煎至六分。去滓溫服。不以時

又方

右用新綿燒灰研細。每服一錢。旋入少麝香。溫酒調下。米飲亦可。王氏手集青金散。治肺嗽喘息有音。及熱搏上焦。血溢妄行。欬唾血出。咽

嗌疼痛。煩渴嘔吐。寒熱休歇。減食羸瘦方

白芨末

青黛研各半兩

右同研勻。每服半錢。或一錢。糯米飲調下

黃芩膏。治小兒衄血。吐血下血

右以黃芩為末。鍊蜜丸如雞頭大。三歲一丸。濃鹽湯下。一方栢葉石榴花為末吹鼻。治衄血吐血。一方定州瓷器末。治嘔血破血止血。又方鼻衄久不止。用刺耳許入鼻立效。又治小兒面目卒得黑丹如芥狀。不急治。遍身即死。以猪脂調塗之即愈

栢枝散。治小兒衄血吐血

栢枝 乾者

藕節 乾者

右等分為末。三歲半大盞藕汁入蜜。沸湯調下。一方白芍藥為末磨犀角汁調。治咯血衄血。又方龍骨為末吹鼻。治衄血。如咯血吐血。藕汁調下半錢。又方治吐血止。及唾血。蒲黃冷水調。生地黄汁調下尤妙

獨聖散。治小兒吐血嗽血

右以赤芍藥為末。藕汁入蜜少許調下。食後。又方桔梗煎湯調下。及

治衄血下血

覆黃散。治小兒吐血。百治不差。十無一失。

右以大黃為末。取生地黃汁微煎。入蜜調下。量大小加減服之。三兩服立效。又一方以白膠香為末。新汲水調下。

桂心膏。治十歲以上。久吐血氣虛。胃鬲不利。

右以桂心為末。取生地黃汁。薑汁蜜等分。熬稠為丸。如雞頭大。十歲兩丸。取藕汁入蜜。白湯化下。

辰膠散。治小兒吐血。

阿膠炒

蛤粉等分

辰砂少許

右為末。和粉紅色。三歲一錢。藕汁和蜜調下。

一方藕節日乾為末。人參蜜湯調下。能消瘀血。刺薊散。治小兒九竅出血。

右以刺薊一握絞汁。入好酒合和服之。如無青者乾者為末。冷水調下。三歲一錢。十一方載。幼幼新書。

楊仁齋直指方蒲黃散。治小兒吐血咯血。

生蒲黃

油髮灰等分

右研細。每一錢。煖生地黃汁調下。或米飲亦得。
地黃汁方。治小兒吐血衄血。

生地黃汁取一合。調髮灰半錢。分作兩服。食後少頃灌下。
曾世榮活幼心書。人參芎歸湯。治九道血妄行。

人參 去蘆

川芎

當歸 酒洗 三味 各半兩

荊芥 二錢半

右件。咬咀。每服二錢。水一盞。煎七分。無時溫服。
小兒嗽血

方

王氏手集解肌丸。治外搏風邪。內挾痰飲。寒熱往來。煩渴頰赤。心忪減食。
熱在上焦。欬嗽有血方。

防風

地骨皮 各一分

右件。燒沙糖為丸。每服一九。食後煎紫蘇湯下。
團參丸。治嗽血方。

阿膠

皂兒黃

人參 各半兩

右除膠為細末。湯少許。洋膠和如雞頭大。白湯化下。

朱氏家傳雞清散。治欬嗽出血下涎。

鬱金

半兩。用皂莢漿水一盞。或酸棗汁亦得。煑乾為度。

滑石

半兩生

雄黃

半兩。醋煑半乾用。

右為細末。每服一字。常服薄荷湯調下。止嗽。螺粉水下。嗽血。雞子清

調下。二方載切切新書

小兒大便血

論

太平聖惠方夫小兒大便血者。為心主於血脉。心臟有熱。熱乘於血。血性得熱。流散妄行。不依常度。其血流滲於大腸者。故令大便血出也。鄭端友全嬰方夫大便血者。是大腸熱結。損傷所為也。臟氣既傷。風邪自入。或蓄熱。或積冷。或濕毒傳於脾胃。或疳食傷於臟腑。因茲冷熱交擊。疳濕互作。致動血氣。停留於內。凝滯無歸。滲入腸中。故大便下血也。又有或腹脹。冷氣在內。攻衝。亦令大便下血。又因風冷乘虛。客入脾胃。或瘀血。腸胃濕毒。下如豆汁。又疳傷於臟。亦能便血。若上焦心肺積熱。流注大腸。亦令大便下血也。亡血脾弱必渴。久則血虛。其人必肌體萎黃。頭髮不黑矣。郭彌明方便集一小兒年踰十歲。夏月便血。醫者以涼藥治之。雖皆輕減。然而

下血不止。近及一年。每如臟毒。涼藥愈進。而其證自若。醫無策處之。忽有人來自遠方。且云。先乃熱疾。今延日久。又服涼多。合是臟寒。生風。反下惡血。血濁者。五臟風毒也。法當微溫去風。則安矣。遂令服四物湯。旬日乃止。蓋當歸。地黃。有溫性。而勻散血氣。使之不聚于臟而下也。芍藥。川芎。有溫性。而除去風血。使之不滯于臟而毒去也。醫療之術。亦當窮理。知變。豈可執一偏之見乎。演山省翁活幼口議。議曰。兒生七日之內。大小便有血出者。此由胎氣熱盛之所致也。母食濃酒。細麪。炙烤醃醢等。流入心肝。兒在胎內受之。熱毒亦傳心肺。且女子之臟。其熱即入於心。故小便有之。男子之臟。其熱即入於肺。故大便有之。血出淡淡。有似坯水。盛則其血加鮮。凡遇有此。不可它藥。盡以生地黃根。研取自然汁五七匙。一二匙。蜜半匙。和勻。溫溫與服。移時安愈。男女皆效。不請疑誚。甘露飲。宜兼與服。不必它藥。萬一無恙。勿自忽遽。妄投丸散。徒咎矣。鄭端友全嬰方。大便下血歌。風冷腸間。又熱攻。交相繫。作糞須紅。疝腸臟腑。令便血。錢氏云。筋疝瀉血而瘦。孫氏云。疝傷心肺。腸中下血。濕毒兼停在胃中。古書云。腸胃有濕毒。血下如赤。

豆汁。經濟小兒保命方。書脫紅瀉血證。詩曰。脫紅瀉血積。因傷冷熱攻。脾作滑腸。消渴口乾焦。上熱氣攻。虛腫面青黃。若有此等候。可服槐仁散。并

陳槐花藥。或瀉後變作赤白顏色不一。可服前項諸瀉痢等藥

方

孫思邈千金要方治大便竟出血方。鼈頭一枚。炙令黃黑為末。以飲下五分七。多少量兒大小。日三服。外臺救急作鼈甲

又方。燒車釭一枚令赤。內一升水中。分二服

又方。燒翫帶末傳乳頭上。令兒飲

仙人水鑑小孩子遺血。呼為胎風。宜使此方。人多不識。每因上廁犯之。至三歲以上解行。後有少鮮血。宜用此散子方

胎腸風最惡。日久殺孩兒。如後有鮮血。宜取一甘梨。梨內安琥珀。并密封燒之。宜待交梨碎。取研救孩兒

右取一顆好梨去心。入少許琥珀末并蜜。即以麩裏泥毬之火中。煨一伏時。取出去皮研。以水調服立效

子母祕錄治小兒下血

右取雌雞翅下血服之。已上二方。出幼幼新書

太平聖惠方羚羊角散。治小兒大便出血。體熱黃瘦。不欲飲食

羚羊角屑

黃耆剉

川升麻

黃芩

地榆剉

甘草

炙微赤剉已上各一分

生乾地黄半兩

右件藥擣鹿羅為散。每服一錢。以水一小盞。入苦竹茹半分。煎至六

分。去滓不計時候。量兒大小。分減溫服之。

槐花散。治小兒大便出血。腹痛黃瘦。不欲飲食。

槐花微炒

白朮

熟乾地黄

芎藭已上各半兩

黃耆剉

木香

當歸剉微炒

甘草炙微赤剉已

上各一分

右件藥擣鹿羅為散。每服一錢。以水一小盞。煎至六分。去滓不計時

候。量兒大小。分減溫服。

食 卷栢丸。治小兒大便出血。久不止。面色萎黃。肌體羸瘦。或時腹痛。不欲飲

食

卷栢半兩

赤石脂半兩

阿膠半兩擣碎炒令黃燥

槐花微炒

黃牛角鯁

炙黃焦

當歸剉微炒

黃耆剉

芎藭已上各一分

右件藥擣羅為末。鍊蜜和丸如麻子大。三歲兒。每服以粥飲下七丸。

日三服。量兒大小。以意加減。

治小兒大便後出血方

鼈甲一枚。塗醋炙令黃焦。去裙襴

右件藥搗細羅為散。每服以粥飲調下半錢。日三服。量兒大小。以意加減

又方

鹿角燒灰

右件藥細研。以粥飲調下半錢。日三服。量兒大小。以意增減。太醫局沒石子丸。治小兒腸虛受熱。下利鮮血。或便赤汁。腹痛後重。晝夜不止。遍數頻多方

沒石子

地榆各半兩

黃連

剉炒一兩半

黃栢

剉碎蜜炒二兩

酸石榴皮

一兩

右件搗羅為細末。以醋煮麩糊和丸如麻子大。每服十九至二十九。溫米飲下。食前服

茅先生方治小兒大便下血

枳殼去白麩炒 荊芥穗

甘草各等分

右為末。每服一錢。用陳米飯飲調下

九籥衛生方紫參散。療小兒下血腹痛

臭椿根皮

貫衆

紫參

酸石榴皮燒灰存

性。各等分

右同為細末。每服一錢。米飲調下。腹痛煎艾湯調下

孔氏家傳神效散。治小兒大腸有血。上後有血。如痢疾相似。但不拘十歲以上。皆治之

芍藥

地榆

甘草炙

陳橘皮

黃連

乾葛已上各等分

右為末。每服一錢。用陳米飲調下。日進三服

槐黃散。治小兒便鮮血

黃耆一兩

當歸

槐花

白朮

人參

芍藥各三分

右為末。米飲下一錢。小兒半錢

朱氏家傳小兒熱氣攻大腸。其病瀉血。臟腑疼痛。漸如茶色。難治。此病是傷寒出汗不盡。或因瘡子出不足。令熱氣行於大腸。所以瀉血。如治先解汗。後下氣。攻大腸散方

鬱金 一兩

乾薑 半兩

大腹皮 一兩半

右為末。每服半錢。陳米飲下。

吉氏家傳治瀉血不定。是脾胃氣冷。大腸風毒。宜服此方。

沒石子 一箇大者

肉豆蔻 一箇

茶末 一錢

檮根白皮 二錢炙

右件末。不計時候。以水如茶點一錢。灌服立差。已上六方。出切切新書

鄭端友全嬰方桂心散。治小兒吐血。或便血。

右以桂心去皮。不見火為細末。三歲半錢。藕汁同蜜半匙調下。立效。

胃風湯。亦治下血。方見瀉痢類

箬葉散。治小兒大便中有血。或純下血。

右以茶箬燒灰存性為末。米湯調下。食前。

五倍丸。治小兒大便下血。如腸風臟毒。

右以五倍子焙乾為末。鍊蜜丸如小豆大。三歲三十九。米湯空心下。

訶灰散。治小兒因疳。大便有血。

右以訶子燒存性。一半為末。米湯調下。食前。三歲一錢。一方椽斗子。

合白梅。濕紙裹。燒灰存性為末。米湯調下。食前服之。

史載之方治小兒久便血

黃連 一錢炒半焦

白茯苓 去刺半兩

槐花 炒焦

獨活

訶子 炮取肉

枳實 炒焦

荊芥穗

蔓荊子 各一分

木香 一錢半

白芍藥 三錢

甘草 二錢炙

右為細末。食後水一盞煎三錢。取七分和滓服。或鍊蜜丸如梧子

大。清湯下三四十九丸無時。日一服。或二服

魏氏家藏方梅連丸。治小兒大便下血

黃連 去鬚

當歸 去蘆各二錢半

烏梅肉 半兩

右為末。鍊蜜丸如菉豆大。粥飲下。不拘時候

表當時大方胃風丸。治下血。不下乳食

人參

白茯苓

白朮

天麻

防風 各半兩去叉

乾蠍 一箇去毒

右為細末。糊丸如麻子大。每服三十九丸食後米湯下

小兒大小便血

論

巢元方病源。心主血脉。心臟有熱。熱乘於血。血性得熱。流散妄行。不依常度。其流滲於大小腸者。故大小便血也。血性得寒。則凝澀。得熱則流散。而心主於血。小兒心臟有熱。乘於血。血滲於小腸。故尿血也。鄭端友全嬰方。夫小便者。蓋心主血。與小腸相合。血之流行。周遍經絡。循環臟腑。若熱聚膀胱。血滲入脬。故小便血出也。郭彌明方便集。廖人之子。年十歲許。尿血三載。管筒澀痛。醫作熱淋治之。竟未取效。不免相叩。予曰。夢寐驚悚否。曰然。每驚又甚。予曰。是其證也。本因驚而入心。心與小腸為受盛。心通小便。心因驚而有熱。熱隨小便而行。故尿血。血熱故澀也。此特輕耳。若使驚甚。則外腎吊入。陽道萎縮。小便或血或赤。而澀痛也。赤者。血之餘。無非熱耳。人徒知治熱淋。而不能鎮靜其心也。今投龍齒散以鎮心。心安而涼。水道自無熱矣。是清其源也。又用石韋丸以寬滑水道。管筒自無澀矣。乃治其源。旬日。心安不悸。便乃滑矣。

方

孫思邈千金要方治小兒尿血 燒鵲巢灰。并花水服之。亦治夜尿牀

又方 尿血灸第七椎兩傍各五寸。隨年壯

姚和衆方治小兒尿血 用甘草五分。以水六合。煎取二合。去滓。一歲兒

一日服令盡

又方 用蜀升麻五分。水五合。煎取一合去滓。一歲兒一日服盡

太平聖惠方阿膠散。治小兒尿血。水道中澀痛

阿膠一兩。搗碎炒令黃燥

黃芩一分

梔子仁一分

車前子一分 甘草一分。炙微赤剉

右件藥搗細羅為散。每服用新汲水調下半錢。日三四服。量兒大小。以意加減

又方

榆白皮半兩 生乾地黄半兩 甘草一分。炙微赤剉

右件藥都細剉。以水一小盞。煎至六分。去滓溫服。量兒大小。以意加減

又方

苦楝子一兩 鬱金二枚。一炮。一枚生用

右件藥搗細羅為散。每服煎葱湯調下半錢。量兒大小。以意增減

又方

生乾地黄 黃芩已上各半兩

右件藥搗麤羅為散。每服一錢。以水一小盞。煎至六分。去滓溫服半

合量兒大小。加減服之。

又方

紫苑 洗去苗土 黃連 去鬚

甘草 炙微赤剉。各一分

右件藥擣麤羅為散。每服一錢。以水一小盞。入豉三十粒。煎至五分。去滓。量兒大小。加減服之。

又方

葵子 車前葉

甘草 炙微黃剉 川朴消 已上各一分

右件藥擣麤羅為散。每服一錢。以水一小盞。煎至五分。去滓。量兒大

小。分減溫服。

又方 牛蒡根 洗去土

右擣絞取汁。一中盞。入生蜜一合。各相和令勻。每服半合。日三四服。量兒大小。增減服之。

又方 取蒲黃末。以溫水調下半錢。量兒大小。加減服之。

又方

車前葉 半斤擣。絞取汁 沙糖 一兩

右件藥相和令勻。每服半合。量兒大小。加減服之。

又方 以生地黄汁。每服暖一合服之。量兒大小。以意加減。
茅先生方治小兒小便下血方

生地黄汁 小半兩

輕粉 半錢上

右作一服。用井華水下載切切新書

張漢醫方妙選車前散。治熱盛積於小腸。甚則尿血

牡蠣 半兩燒為粉

車前子

甘草 炙微黃剉

川朴消 已上各一分

右件藥搗羅為散。每服一錢。以水一小盞。煎至五分。去滓溫服。量兒

大小加減。不拘時候

吉氏家傳尿血地黄散方

菘豆粉

滑石 各一兩

生乾地黄 二兩
甘草 半兩炙

右末。此病小兒是心藏積熱。并脾藏肝藏積熱。如大人脾藏受病傳

腎。有三陰三陽之脉。小兒八歲以下。只有三陽之脉。無三陰脉。所以

心脾肝三藏受病。不傳腎藏。傳小腸。小腸風熱之極。所以尿血。每服半錢。

新汲水下二錢。二服止。忌熱食酸醎

鄭端友全嬰方箬灰散。治小兒尿血。陰莖中痛

右以多時茶節中箬燒灰存性用一兩。滑石末半兩。竝為末。三歲一錢。燈心煎湯調下。

十便良方雙金自然液。療小兒尿血方。

生地黄汁一升。生薑汁一升。

右二味相和頓服。不差更作。此法計令公處云極效。

郭彌明方便集龍齒散

龍齒 半兩

赤茯苓 三兩

遠志 去心取皮半兩

茯神 去木半兩

半夏曲 半兩

甘草 半兩

右為細末和勻。每服一大錢。水一小盞。入薑三片。熟水葱一莖同煎。食後臨卧溫涼服。

石韋丸

石韋 一兩。刮去葉上毛。用葉。

滑石 半兩。不用青黑者。

木通 半兩

茆花 茆根可食者。用花半兩

豬苓 去皮半兩

黃芩 二分

茯苓 一兩

右為細末。水煮薄荷米糊為丸。如菘豆大。每服二十九。空心溫白湯下。量歲數加減。小便少者。加車前草湯下。

楊仁齋直指尿血方

生蒲黃

生地黄

赤茯苓

甘草微炙等分

右剉每一錢。水一小盞。煎七分。調髮灰。食前服。
小兒大便不通

論

巢元方病源小兒大便不通者。腑臟有熱。乘於大腸故也。脾胃為水穀之海。水穀之精華化為血氣。其糟粕行於大腸。若三焦五臟不調和。熱氣歸於大腸。熱實故大便燥澀不通也。聖濟總錄論曰。水穀皆入於上焦。至中焦而腐熟。下焦而化出。小兒腑臟挾熱。三焦壅滯。津液枯少。不能傳道。實熱之氣歸於大腸。故大便燥澀而不通也。

方

王燾外臺祕要方紫雙丸。主小兒身熱頭痛。飲食不消。腹脹滿。或小腹絞痛。大小便不利。或重下數起。小兒無異疾難。飲食過度。不知自止。哺乳失節。或驚悸寒熱。惟此丸治之。不差。復可再服。小兒欲下。是其蒸候。哺食減少。氣息不快。夜啼不眠。是腹內不調。悉宜用此丸。不用他藥。數用神驗。千金不傳方。

巴豆去皮心熬 蕤核仁各十八銖。別擣 麥門冬十銖。去心

甘草五銖。炙 甘遂 真珠各二銖 牡蠣熬

蠟各八銖

右八味。以湯熟洗巴豆。研以新布絞去油。別擣甘遂。甘草。牡蠣。麥門冬。細篩畢。擣巴豆。蕤核仁。令極熟。乃內諸藥散。更擣三千杵。如藥燥。入少蜜足之。半歲兒。可服如荏子一雙。一二歲兒。服如半麻子作一雙。三歲兒。服如麻子一枚。作一雙。四歲兒。服如麻子二丸。五六歲兒。服如大麻子二丸。七八歲兒。服如小豆二丸。九歲十歲兒。微大於小豆。二丸。常以雞鳴時服。至日出時不下者。飲熱粥汁數合。即下。丸皆雙出也。下甚者。飲冷粥止之。

又方 療小兒大便不通

右用豬苓一兩。以水少許。煮雞屎白一錢七。與服立差。

太平聖惠方大黃散。治小兒臟腑壅熱。心神煩燥。大便不通。

川大黃一兩。剉。微炒 犀角屑半兩 川升麻半兩

當歸一分 赤芍藥一分 紅雪一兩 甘草一分。炙。微赤剉

右件藥。擣鹿羅為散。每服一錢。以水一小盞。煎至六分。去滓。三四歲

温服一合。量兒大小加減服之。日三四服。以利爲度。
芎藭散。治小兒大便不通。腹脇妨悶。

芎藭 半兩

川大黃 三分。剉。微炒。

郁李仁 三分。湯浸。

去皮微炒

右件藥擣細羅爲散。每服一錢。以温水半盞調服。量兒大小。以意加減。以利爲度。

又方

陳橘皮 一分。湯浸去白瓢。

牽牛子 半兩。微炒。

甘草 一分。炙。微赤剉。

川大黃 半兩。剉。微炒。

右件藥擣細羅爲散。每服煎葱白湯調下半錢。量兒大小。以意加減。

日三兩服。以効爲度。

丹砂丸。治小兒大便不通。心神煩熱。卧忽多驚。腹脇妨悶。

丹砂 半兩。細研水飛過。

續隨子 三分。

膩粉 一錢。

右件藥都細研令勻。鍊蜜和丸如菉豆大。三歲兒。每服以温水下三

丸。量兒大小。以意加減服之。

通中丸。治小兒大便不通。心腹壅悶。卧即煩喘。

川大黃 一兩。剉。微炒。
去皮子。燒令焦黑。

巴豆霜 三分

皂莢 一兩。不蛀者。

右件藥大黃。皂莢。擣羅為末。入巴豆霜同研令勻。鍊蜜和丸。如菉豆大。四五歲兒。以溫水下二丸。量兒大小。以意加減。

犀角丸。治小兒臟腑壅滯。腹脇妨悶。大便不通。

犀角屑 半兩

當歸 半兩。剉。微炒。

川大黃 一兩。剉。微炒。

巴豆 十枚。去皮。心研。紙裹。壓去油。
飛過。

丹砂 半兩。細研水。

右件藥擣羅為末。入巴豆丹砂同研令勻。鍊蜜和丸。如菉豆大。三歲兒。以溫水下三丸。量兒大小。以意加減。

大黃丸。治小兒大便不通。心腹壅悶。

川大黃 一兩。剉。微炒。

枳殼 三分。麩炒。微黃。去瓢。

梔子仁 三分

郁李仁 三分。湯浸。去皮。微炒。

右件藥擣羅為末。鍊蜜和丸。如麻子大。每服以熟水下五丸。量兒大。

小。加減服之。

桃葉湯。治小兒大便不通。臍腹妨悶。宜用。

桃葉一握
葱白七莖

木通二兩

燈心五莖

川朴消一兩

右件藥細剉。用醋漿水三大椀。煎十餘沸。去滓。傾向盆中。稍溫便坐。兒在盆內。將滓以手帕裹熨於臍下。冷即出之。後喫地黃稀粥半盞。良久便通。

走馬煎。治小兒大便不通。連腰滿悶。氣急困重。

羊膽一枚

蜜一合

鹽花半兩

右件藥同煎如飴。撚如筋。麈可長一寸。內下部中。須臾即通。

牛黃丸。治小兒大便不通。心中煩熱。

牛黃一分。細研。川大黃三分。剉微炒。搗羅為末。

右件藥都研令勻。鍊蜜和丸。如麻子大。每服以粥飲下七丸。以利為度。量兒大小。加減服之。

治小兒大便五六日不通。心腹煩滿。宜用此方。

右取青顆鹽末。於臍中以手摩。良久即通。大人用之亦得。

蜂房散。治小兒卒大便不通。

蜂房一枚。炙令微焦。

右擣細羅為散。每服以粥飲調下半錢。量兒大小。加減服之。
茅先生方治小兒大便不通

朴消 三錢

大黃 一兩 生用

右為末。周歲一錢半。水五分。煎四分。溫服。

治小兒大便不通。目赤。瘡癩。癰腫。熱毒。心熱。並宜服之。大人加用。

大黃 一分

黑牽牛 半分
檳榔 一錢半

朴消 二錢

右為末。每服一字。或半錢。用蜜熟水調下。

嬰孺方治小兒大便不得

周半夏一分。炒黃為末。以蜜為丸。黍米大。乳服一丸。日再服。此方頻救垂困。功效不可具言。

小兒大便不通方

杵白花胡葵子為末。煮汁服之。

又方 用豬脂一斤。水煮取一升。服五合。日三服。小兒量之。

又方 煎蜜令可索。索之。捻如七柄。內下部中二寸許。立通。

又方 取羊膽汁灌下部中。須臾通。

丹參湯。治小兒大便不通。腹滿。

丹參

消石

甘草炙等分並杵為末

右以水二升。煮棗三箇。三沸去滓。下末三方寸匕。又煮三沸去滓。五

歲兒服五合。不差再服

大黃丸。治小兒腹大鳴。及內熱堅。不得大便更衣

大黃 七分

葶藶 四分炒

牛黃 三分

人參

厚朴 炙

芫花

炒各二分

桂心

黃芩 各一分

右為末。蜜丸小豆大。飲下三丸。不知加之

治小兒胃中熱。更衣起黃赤而難。或四五日。乃大便難方

大黃

甘草 炙

菰藪 各三分

大棗 三十箇

右以水二升半煮一升。每服一雞子許。日進三服

牛黃丸。治小兒調中利大便

牛黃

大黃

麝香

右三味等分為末。蜜丸如小豆大。飲下二丸。日再。以利為度

漢東王先生方金花散。治小兒大腸秘不通。兼血痢

郁李仁

一分炒 檳榔 一箇生

甘草 一分

右為末。每服一字。或半錢。砂糖熟水調下。已上十二方。出幼幼新書

聖濟總錄大黃丸。治小兒大便不通

大黃 剉炒一兩一分

枳殼 去瓢麩炒 梔子仁

郁李仁 炒去雙仁皮尖

大麻仁 研各三分

右五味搗研為末。鍊蜜丸如麻子大。一二歲兒每服五丸。熟水下。空

心午後各一服。更隨兒大小加減

滑石湯。治小兒大便不通

滑石 研 大黃 剉

冬葵子 甘草 炙各半兩

右四味麤搗篩。三四歲兒每服一錢七。水一盞。入燈心七莖。同煎至

五分。去滓溫服。更隨兒大小加減

橘皮湯。治小兒大便不通

陳橘皮 去白焙 牽牛子 炒

甘草 炙 大黃 剉炒各一分

右四味麤搗篩。五六歲兒每服一錢七。水一小盞。入葱白一莖。擘碎

同煎至五分。去滓溫服。未通再服。更量兒大小加減

木通湯。治小兒大便不通

木通 剉炒 大黃 剉炒

陳橘皮 去白焙各一兩

右三味麤搗篩。三四歲兒每服一錢七。水一小盞。煎至五分。去滓溫

服。更量兒大小加減
橘皮湯。治小兒大便不通

陳橘皮 去白焙。一分

大黃 剉炒半兩

右二味麤擣篩。三四歲兒每服一錢七。水一小盞。煎至五分。去滓溫

服。更量兒大小加減

二黃丸。治小兒大便不通。調中

大黃 一兩剉炒 牛黃 研

甘草 炙

人參 各一分

右四味擣研為末。鍊蜜丸如小菉豆大。每服二丸。米飲化下。日再服。

得利即止

黃連丸。治小兒風熱壅滯。大便秘澀

黃連 去須 大黃 剉炒。各一分

巴豆 三粒。去心膜

皮。出油研

右三味擣研為細末。麩糊為丸如麻子大。每服三丸至五丸。臨睡柳枝湯下

代赭丸。治小兒大便

代赭 研

丹砂 研

大黃 剉。各二兩

木香

當歸

焙。各一兩一分

桂

去麋皮一兩

生犀角鎊三分 巴豆

炒熟去皮心。擣爛一兩半

右八味擣研為末。鍊蜜丸如小豆大。每服一丸至二丸。空心米飲化下。六七歲三丸。二百日兒半丸。但得溏利為度。

鼈甲丸。治小兒大便不通。

鼈甲

醋炙黃。去裙襴

防葵

訶梨勒

煨用皮

大黃

剉炒

人參

當歸

剉焙

郁李仁

湯浸去皮

尖。微炒別研入

右七味等分。六味擣為細末。入郁李仁和勻。鍊蜜丸如菉豆大。粥飲下五丸。微利即差。

牛黃散。治小兒大便不通。口燥頰赤。

牛黃研一分

大黃剉炒

甜消

研各一錢

甘草

炙剉

人參各二錢

右五味擣研為細散。每服半錢匕。新水調下。乳食後服。

張銳雞峯方。治大便秘結不通。

用麻子。以水研汁飲之。

莊氏家傳治小兒大腸風熱盛不通

大黃 一兩

防風 一兩

朴消 二兩

右件為末。用蜜湯。或葱湯調下

孔氏家傳治小兒大便不通。於消風散中。入鷹條一二寸。遂通。蓋庸醫見小兒大便不通。多服涼藥。與踈轉藥。積於中。涼轉藥一併發。則其人困矣。此方最佳

危亦林得効方沒藥散。治風與滯血。留蓄上焦。胃膈高起。大便不通

沒藥

大黃

枳殼 炒

北梗 各二錢

木香

甘草 炙 各一錢

右剉散。每服一錢。薑二片。水一盞煎服

曾世榮活幼心書寬腸丸。治痢後裏急。大腑閉澀不通

枳殼

同上製。仍用清油浸透一宿。焙乾五錢

麻仁 去殼

木通

去皮節

大黃 半生半炮

檳榔

大腹皮 淨洗焙乾

五味 各二錢半

右除麻仁。用乳鉢極細杵。外五味。檳榔不過火。餘焙同研成末。入乳鉢中與麻仁再杵勻。鍊蜜丸。菽豆大。每服三十丸。至五十丸。仍以枳

殼甘草煎湯空心下。一二月嬰孩温蜜湯化服

閉 枳殼丸。治大腑虛閉氣閉連日不通。痢後裏急用之亦效。及踈利小便熱

枳殼不拘多少。剉片麥麩炒過。仍以清油浸透一宿焙乾

右焙為末。鍊蜜丸作芡實大。兒小者用甘草糯米煎湯化下。一九至二九。兒大者菘豆大。每服三十九。或五十九。食前温米清湯送下。小

腑熱閉用車前子煎湯候温空心投之

通聖餅。治大腑閉澀連日不通。滿腹膨脹。氣壅悶亂。服藥罔效

淨黃連 三錢 巴豆 和殼七粒 生蒜一箇 生鹽 半錢

右以黃連剉碎為末。同後三味石鉢內爛杵。捻作餅子寸半闊貼臍

緊搓乾艾切作菘豆大五枚。作五次安臍間餅子上。以火灸之即通

小兒大小便不通

論

巢元方病源小兒大小便不利者。腑臟冷熱不調。大腸有遊氣。氣壅在大

小腸不得宣散。故大小便澀不流利也。翰林待詔楊大鄴問小兒大便秘

澀者為何。荅曰。乳食失度。使之四大不調。滋味有貪。逐五藏受物。甘甜聚

食。鹹醋滯涎。食滯留結胃腸。風壅漬癖於心肺。氣脉不順。水穀不行。雖不逆於上焦。即秘結於下部。小兒不知疼痛。莫說因由。驚啼叫以頻頻。但怒脹而不乳。不知孩兒痛刺連臍。則面色青黃。但按脉息與治。若不見病源。只依外變用藥。必剋安效。田氏保嬰集便難燥結。兒或服澀藥。腹脹悶亂。命在頃刻。可用握宣丸。以男左女右手握之。不移時。大小便自利也。張子和儒門事親書。凡小兒大小便不通。內經謂三焦約。約者不行也。可用長流水煎八正散。時時灌之。大小便利則止。若不因熱藥所攻而致此者。易治。或因多服熱藥而燥劇至此者。非惟難治。不幸夭耳。亦可用蜜水調益九散。送通鬲丸。鄭端友全嬰方。尿難糞結歌。結熱在腸中。尿難糞不通。外加身壯熱。內必引驚風。湯氏望嬰孩妙訣。熱氣還逢府氣衝。便成結毒在腸中。身體若須多燥渴。更兼尿糞不能通。此證宜利下。輕則利之。用四順飲。重則下之。用金星丸。

方

孫思邈千金要方治小兒大小便不通

擣白花胡葵子末。煮汁服之。

又方 右末雞屎白。服一錢七。

王燾外臺秘要方主小兒大小便不通妨悶

用白蜜一合。以鐺中煎為丸。內下部中即通。小便不通。嚼生葱以綿

裹少許。內小便道中即通

子母祕錄治小兒大小便不通

用蜂房燒末。酒服一錢。日再服

錢乙小兒方郁李仁丸。治襁褓小兒。大小便不通。并驚熱痰實。欲得溏動

者

川大黃 一兩。去麤皮。用實者剉碎。酒浸半日。住。乾炒為細末

郁李仁 一兩。去皮

滑石 十兩。細研

右先將郁李仁研成膏。和。大黃滑石丸如黍米大。二歲服三二丸。更

量大小與之。以乳汁。或薄荷湯下。食前

張渙醫方妙選芎藭黃散。治藏府有熱。小便澀兼大便不通

芎藭 一兩

川大黃 三分。剉。微炒

郁李仁 三分。湯浸

去皮。微炒

右件擣羅為散。每服一錢。以溫水調下。量兒大小加減

朱砂丹

朱砂半兩。細研水飛

續隨子半兩 膩粉一錢

右件藥都研令勻。煉蜜和如黍米大。每服七粒。以溫水下。量兒大小

加減。乳後食

惠眼觀證芍藥散。治小兒大小便下藥不通者

芍藥 大黃 甘草炙 當歸

朴消各一分

右為末。每服一大錢。水一盞。瓦器中煎至半盞。去滓服即通

吉氏家傳治大小便不通

甘草節炮 槐花洗各一兩

右件末。每服一錢。茶半盞湯點下

又方

滑石一大錢 燈心一握

右以水二椀煎至一盞溫服已上二方載切切新書

阮霖經驗良方治小兒大便不通

以甘草木通。梔子仁。等分為粗末。水一大盞。燈心十莖。連根葱白七

箇煎半盞服之

田氏保嬰集握宣丸。治小兒大小便難。嘔吐藥食不下。命在頃刻。

巴豆一錢半

硫黃

良薑

附子

檳榔

甘遂 各等分

右為細末。粟米飯和丸。菉豆大。用椒湯洗小兒。男左女右手握之。用

綿裹定。看行數多少。置藥洗去。不用即止。

劉智經驗普濟加減方。捻頭散。治小兒大小便不通。

延胡索

川苦練 各三錢 皂角子灰 三錢

右為末。每服三二錢。捻頭湯調下。以意加減。自利効。

曾世榮活幼心書透徹膏。治大小腑秘澀。投諸藥無驗。不拘老幼。並皆瘳之。

穿山甲尾 足上者佳。燒透二錢重

五靈脂 淨者。二錢重

右二味碾為細末。次以巴豆二錢重。去殼研碎。和前藥末。仍用大蒜

四錢重。去上粗皮三五層。於砂鉢內爛杵如泥。丸作一餅。納臍中。以

絹帕繫之。外以掌心火上烘熱。熨至八九次。聞腹中微響即通。

小兒大小便數

論

孫思邈千金要方脾與胃合。胃為水穀之海。水穀之精化為血氣。以行經

脉。其糟粕水液。行之於大小腸。若三焦平和。則五藏調適。虛實冷熱不偏。其脾胃氣弱。大小腸偏虛。下焦偏冷。不能制於水穀者。故令大小便數也。

小兒大便青
論

太平聖惠方。夫小兒大便青者。因驚氣及脾氣不和。大腸虛冷。乳食不消。冷氣搏於糟粕。故令大便青色也。鄭端友全嬰方。夫大便青。臍冷也。或初出微黃。良久則青者。亦然也。靈蘭秘典云。瀉下如藍。澱胎中受積驚。蓋心受驚。心主驚。心驚則膽怯。膽者與肝為表裏也。膽怯則肝冷。肝傳脾。脾受邪。故大便初出微黃。脾之本色。良久復青。肝之本色也。肝熱則外發目赤。肝冷則內作便青。又有不因驚而得此證者。蓋稟胎氣怯弱。內受風寒。故也。有便青夾白。濃稠粘如涎者。亦是腸寒。久則令兒面白形青。腹痛驚啼。失治則變陰癇也。李樞小兒保生要方。小兒青糞者。冷也。亦是肝剋脾之證也。肝屬木。其色青。脾屬土。其色黃。糞黃脾家之本色也。若脾受肝剋。則其糞青。肝木主風。宜早治之。不爾成脾風發癇也。然所謂青糞。纔下便青。若初下時黃。良久乃青。小兒安樂者。皆然。不可認為青糞也。可服白附子丸。羌活膏。張杲醫說載小兒糞青。此脾虛生風之證也。脾屬土。其色黃。糞

黃則是脾家正色。今乃青。肝木剋脾也。肝屬木。其色青。肝盛脾虛。受肝之剋。故糞青也。當服益脾去風藥。如半硫丸加白附子。蝎稍可以治之。雖然小兒青糞。拋下便青者。是風冷也。良久然後青者。非病也。小兒糞自然如此。田氏保嬰集便青因驚氣內感。脾氣不和。治法宜服白朮湯。鄭端友全嬰方糞中雜色。詩曰。糞雜元因積。醜酸是食傷。驚深青。澱沫。疳白臭。非常。五臟糞色。詩曰。肝冷傳脾糞。綠青。焦黃脾熱土之形。肺腸寒積。膿粘白。赤黑。因心腎熱成。

方

太平聖惠方白朮丸。治小兒大腸虛冷。乳食不消。大便青色。

白朮

白芍藥

木香

當歸

剉微炒已上

各一分

麝香一錢細研

右件擣羅為末。鍊蜜和丸如菉豆大。每服以粥飲研下五丸。日三服。量兒大小。以意加減。

訶梨勒丸。治小兒內冷。腹脇妨悶。大便青色。不欲乳食。

訶梨勒

一兩煨用皮

白朮

半兩

白茯苓

一分

當歸

一分。剉微炒

陳橘皮

半兩湯浸。去白瓢焙

甘草 半兩。炙微赤剉

白芍藥 半兩

厚朴 半兩。去粗皮。塗生薑汁炙令香熟

右件擣羅為末。鍊蜜丸如梧子大。三歲兒每服以粥飲研下五丸。日三服。量兒大小。以意加減

陳橘皮丸。治小兒內冷。大便青不欲食。皆是胎寒

陳橘皮 湯浸。去白瓢焙

當歸 剉

人參 去蘆

芎藭 已上各半兩

甘草 一分。炙微赤剉

白芍藥

右件藥擣羅為末。鍊蜜和丸如菉豆大。三歲兒每服以溫粥飲下七丸。日三服。量兒大小。以意加減

木香丸。治小兒胎寒腹痛。大便青

木香

蓬莪茂

白朮

當歸 剉微炒。已上

各半兩

麝香 一分。細研 白芍藥 一分

人參 去蘆半兩

右件藥擣羅為末。都研令勻。鍊蜜和丸如菉豆大。二歲兒每服以溫粥飲下七丸。日三服。量兒大小。以意加減

芎藭丸。治小兒胎寒腹痛。大便青

芎藭 二分

黃耆 三分剉

牛黃 半兩細研

麩蟲 三分微炒

麝香 一分細研 當歸 半兩剉微炒

白芍藥 一分

右件藥擣羅為末。都研令勻。煉蜜和丸如麻子大。每服以粥飲下五丸。日三服。看大小以意增減。

當歸丸。治小兒大便青。不欲食。皆是胎寒。

當歸 剉微炒

人參 去蘆頭

白芍藥

芎藭 已上各半兩

甘草 一分。炙微赤剉

右件擣羅為末。煉蜜丸如麻子大。每服以乳汁下三丸。日三量。兒大

小。以意加減。

吉氏家傳治小兒驚瀉青屎

用硃砂米粒大。細研入輕粉少許。荊芥湯一茶脚調下。

李掣小兒保生要方白附子丸。治小兒青糞。及吐而有冷證多者。

白附子 二錢半末

蝎蛸 二錢半末

舶上硫黃 半兩研細

半夏 半兩。生為細末。生薑自然汁和成劑。拍作小錢大餅子。沸湯

內下。候煮熟不麻人為度。取起研成膠。

右將前三味一處研勻。入在半夏膠內和得所。乾即添湯。丸如蘿蔔

子大。每服三五十粒。米湯或乳汁下。

楊倓家藏方溫藏湯。治小兒因驚滯乳。氣不宣導。冷搏腸間。下利青沫。或

乳多傷脾。妳辦不化。常服溫藏府。暖脾胃。化宿冷。進乳食。

人參 去蘆一兩

白附子 炮

白朮

陳橘皮

去白各半兩

丁香

神麴 炒黃

麥蘖 炒黃

甘草

炙黃四味各

二兩半

右件為細末。每服半錢。煎棗湯調下。空心食前。

小兒小便不通

論

巢元方病源。小便不通利候。小便不通利者。腎與膀胱熱故也。此二經為表裏。俱主水。水行於小腸。入胞為小便。熱氣在其臟腑。水氣則澀。故小便不通利也。聖濟總錄論曰。腎主水。與膀胱合為表裏。膀胱者。津液之府。其氣下通。故能滲泄而作小便。或胞脘有熱。津液內燥。氣不宣暢。故水道熱澀。甚則不通。十便良方治小兒小便赤澀不通。夫小兒小便赤澀不通者。由膀胱與腎有熱故也。腎主於水。膀胱為津液之府。此二經為表裏。而水行於小腸。入於脬為小便。今臟腑有實熱。熱入於脬。故令小便赤澀不通。

也。演山省翁活幼口議議曰：小腸乃心之府也。水竇流行，隨其氣而利之。心氣若壅，小便不通。心氣若冷，小便多。洒音妙謂洒淅也。心氣若寒，小便多。旋心氣若熱，小便艱澀。心氣積熱，小便白赤。先赤而後白者，是所言閉小便者。醫謂下結腹肚脹緊，膨滿不通。其結熱盛，用力努旋，點滴而出。乃是閉不通利。干心疼痛，精神昏悸，速用生大地龍數條，蜜少許研傳莖卵。仍燒蠶蛻紙灰留性。朱砂腦子麝香同研。煎麥門冬燈心湯調與服。移時見效。鄭端友全嬰方：大小便赤澀歌并四順散八正散。氣壅生風熱，大便不踈洩。小水澀難通，頃刻成驚掣。

方

盧顛經治孩子小便不通

茯苓

通草

冬瓜子

車前子

各等分

右水四合。藥半兩。煎一合半。作二服。忌油膩。

葛洪肘後方治卒不得溺。取垢灰二刀圭。以酒若米飲服。又方以髮灰酒下之。又以雞子白亦佳。

孫思邈千金要方地膚子湯治小兒熱毒入膀胱中。忽患小便不通。欲小便則澀痛不出。出少如血。須臾復出。

地膚子

瞿麥

知母

黃芩

枳實

升麻

葵子

猪苓

海藻

橘皮

通草

大黃

右十二味。以水三升。煮取一升。一日至七日兒。服一合為三服。

八日至十五日兒。一合半為三服。十六日至二十日兒。二合為三服。

四十日兒。以此為準。五十日已上。七歲已下。以意加藥益水。

治小兒小便不通

車前草切一升 小麥一升

右二味。以水二升。煮取一升二合。去滓。煮粥服。日三四

又方。以冬葵子一升。以水二升。煮取一升。分服。入滑石末陸銖

仙人水鑑。小兒百日。忽患陰風。疾多殺人。尿不利。若以熱治之。其疾轉甚

也。何以知之。孩兒在胎中時。計父母之陰陽。毒氣或犯孩兒。生下百日而

有斯疾。醫者不辨根源。必言是熱。用冷藥轉之不安。長大成。人遂患陰癥

之疾。蓋由此也。小兒因此招禍。不亦難乎。其疾多尿澀及痛。一尿一餘節

是也。庸醫多作淋疾。遂與石韋草犀角之類。全乖其志。宜須用此方

詩曰。附子燒灰使半枚。水精一分力難排。父母手煎添水蛭。一分

功加須得土衣臺。土衣是瓦屋上所生瓦松。取向陽者。燒為灰用。

右量兒大小。日數與服之。立見神效。

外臺劉氏方療小兒忽不得小便急悶

葱白一握

通草一兩

冬葵子一合

右三味切。以水二升。煮取一升。去滓量服。

外臺廣濟方滑石湯。療小兒熱極。病小便赤澀或不通。尿輒大啼呼。

滑石十六分

子苓十四分

冬葵子八分

車前草切一升

右四味。以水二升。煮取一升。一歲至四五歲。服一合。日再服甚良。

太平聖惠方赤芍藥散。治小兒小便不通。心悶。

冬葵子

赤芍藥

蘧麥

陳橘皮

湯浸去瓢焙

牽牛子微炒

木通

剉已上各一分

右件藥擣麤羅為散。每服一錢。以水一小盞。入葱白一莖。煎至五分。

去滓不計時候。量兒大小。分減服之。

梔子仁散。治小兒小便不通。臍腹妨悶。心神煩熱。

梔子仁五枚

茅根半兩剉

冬葵根半兩

甘草一分。炙微赤剉

右件藥擣麤羅為散。每服一錢。以水一小盞。煎至五分。去滓不計時。

候。量兒大小。分減溫服

又方

滑石 一兩半

木通 三分剉

川芒消 三分

葵子 二合

右件藥擣麤羅為散。每服一錢。以水一小盞煎至五分。去滓不計時

候。量兒大小。分減溫服

冬葵子散。治小兒卒小便不通。小腹急悶

冬葵子 一兩

木通 半兩剉

右件藥擣麤羅為散。每服一錢。以水一小盞煎至五分。去滓不計時

候。量兒大小。分減服之

乳煎葱白飲子。治小兒百日内。小便不通。心神煩悶。臍下痞滿。宜服之

葱白 一莖切

乳汁 三合

右一味。同煎至一合半。去滓分溫為三服。相去如人行十里已來再

服。以利為度

浸熨湯。治小兒小便不通

木通 一兩

生薑 一兩

葱白 七莖

陳橘皮 一兩

川椒 半兩

右件藥都細剉。以水二大椀。煎五七沸。去滓。傾入盆內。看冷煖。坐兒於盆中。浸之。將滓於兒臍腹下熨之。立通。

葵根散。治小兒小便三兩日不通。欲死者。

葵根 一握剉

壁魚 七枚研

右以水一大盞。煎葵根。取汁六分。後入壁魚。同煎五七沸。去滓。放溫。量兒大小。臨時分減服之。

地膚子散。治小兒積熱。小便不通。

地膚子

蘧麥

冬葵子

知母

黃芩

川升麻

木通 剉

川大黃 剉

微炒

猪苓

去黑皮。已上各半兩

右件藥。搗麤羅為散。每服一錢。以水一中盞。煎至六分。去滓。不計時候。量兒大小。分減服之。

滑石散。治小兒小便不通。心腹滿悶。坐卧不安。

滑石末 半兩

甘草 一分。炙。微赤剉

葵子 半兩

川大黃

半兩。剉。微炒

右件藥。搗麤羅為散。每服一錢。以水一小盞。入葱白五寸。燈心一大

束煎至六分去滓。三四歲溫服一合。量兒大小。不計時候。加減服之。
木通散。治小兒小便不通。臍腹堅滿喘急。

木通

剉

甘草

炙令赤剉

葵子

已上各一分

川大黃

剉碎。微炒

滑石

牽牛子微炒。已上

各半兩

右件藥都細擣羅為散。每服煎葱白燈心湯調下半錢。量兒大小。服之以利為度。

車前散。治小兒小便不通。臍腹急痛。

車前子

切半升。小麥二合

右以水二大觔。煮取一觔。去滓。入少粳米。煮作稀粥。時時量力與服。

又方

石韋

半兩。去毛

蘧麥

半兩

小麥

一兩

右件藥都剉。以水二大盞。煎至一觔。去滓。取汁一合。調下滑石末半錢。量兒大小。以意加減。

又方

冬葵子

滑石

海蛤

蒲黃

已上各半兩

右件藥搗細羅為末。每服以葱白湯調下半錢。量兒大小。以意加減。葱白飲子。治小兒小便澀少。妨悶不通。

葱白 二莖

木通 半錢

冬葵子 半兩

右件藥都細剉。以水一大觥。煎至五分。去滓。量兒大小。以意加減。服。又方。治小兒小便不通。小腹妨悶。

用葱白一斤。連鬚細切。煮令熟。以綿裹於臍下。熨之。立通。

又方

桑螵蛸

十枚 炙令黃

右件藥搗羅為末。每服以粥飲調下半錢。量兒大小。加減服之。又方

用頭垢半錢。以溫酒調服之。三歲已下。服一字。譚氏殊聖方。治小兒小便不通。

右芥菜子爛研。以紙花貼臍下。相次通妙。茅先生方。治小兒小便不通。

山梔子

滑石 各等分

右為末。每服半錢。濃煎燈心湯調下。

嬰孺方通草湯。治小兒小便不通。

通草

甘草

滑石 各二兩

葵子 三分

右以水三升。煮六合。二百日兒服半合。日三夜一服。瞿麥湯。治小兒小便不通。

瞿麥

石韋 去毛。各一兩

滑石 二兩

小麥 二合

右以水三升。煮一升。服一合。日四服。夜再。桃仁湯。治小兒暴不得小便。

右用桃仁二十箇。去皮尖。以酒一升。煮三沸。去滓。量兒與之。滑石散。治小兒小便不通。

滑石

杵末。以水二升。和如薄米泔。石未澄。取上汁二傳。

榆白皮

各一兩 葵子 二兩

右切取滑石上汁。煮二味。四沸。絞去滓。調水中。滑石服之。水中澄得者。滑石也。

麻黃浴湯。治小兒小便不通。熱發腹滿。

麻黃

苦參

石膏 各一把

滑石 一升

大黃 五兩

右以水二斗煮一斗。去滓放温浴兒妙。先自臍淋之。

治小兒小便不通泥臍方

右用滑石一升末。以車前草汁和如泥。泥臍方廣四五寸。少覺乾即

除之。別上新泥。冬月無車前草汁。只以水和。

治小兒小便不通方

葵莖 半升 葵子 一升

右以水四升。煮取一升。下滑石末一分。研服半合。日進三服。

滑石湯。治小兒熱病。小便赤澀不通。尿輒啼呼。

滑石 十六分 子芩 十四分 冬瓜子 八分 車前子 一升

通草 十二分 茯苓 五分

右以水四升半。煮一升二合。一二歲為三服。百日一合。已上十方。載

切切新書

錢乙小兒方。捻頭散。治小便不通。

玄胡索 川苦練 各等分

右同為細末。每服半錢。或一錢。捻頭湯調下。量多少與之。如無捻頭

湯。即湯中滴油數點。食前

聖濟總錄石韋湯。治小兒小便不通

石韋 去毛 瞿麥 各一兩半 滑石 一兩

右三味麤擣篩。五六歲兒。每服一錢七。水八分。入小麥一百粒。同煎

至五分。去滓溫服。如人行十里再服。量兒大小。以意加減

治小兒小便淋閉不通。神散方

石燕 一枚。先為細末再研 石韋 去毛半兩

右二味為細散。每服一字七。煎三葉酸漿草湯調下。甚者三服差。一

方。有海金沙 一兩

冬葵子散。治小兒小便不通。臍腹急痛

冬葵子 滑石 海蛤 蒲黃 各半兩

右四味擣羅為散。每服以葱白湯調下半錢七。量兒大小。以意加減

滑石散。治小兒小便淋澀不通。及小便血

滑石 研 車前子 各半兩

右二味細擣羅為散。如二三歲兒。每服半錢七。空心食前粥飲調下。

日二服

萬安散。治小兒小便不通欲死

海金沙

滑石

續隨子炒各半兩

螻蛄七枚。炒令黑

右四味擣羅為細末。每服半錢七。煎燈心湯溫調下。空心食前服

木通黃芩湯。治小兒熱極。小便赤澀不通。小便輒大啼呼疼痛

木通剉一兩

黃芩二兩去黑心

滑石一兩半

冬葵子三分

車前子二兩

赤茯苓去黑皮二兩

右六味麤擣篩。五六歲兒每服一錢七。以水一中盞煎至五分。去滓

溫服。如人行十里已來再一服。更看兒大小。以意加減

瞿麥湯。治小兒小便不通心悶

瞿麥穗

赤芍藥

陳橘皮湯浸去白焙

牽牛子炒

木通剉

冬葵子各一分

右六味麤擣篩。五六歲兒每服一錢七。水一中盞。入葱白一莖擘碎

同煎至四分。去滓溫服。如人行十里已來再服。量大小以意加減

茯苓湯。治小兒小便不通

赤茯苓去黑皮冬葵子

木通剉

車前子各半兩

右四味麤篩。五六歲兒每服一錢七。以水一中盞煎至五分。去滓溫服。如人行十里已來再服。量兒大小以意加減。

鄭端友全嬰方治小便黃赤不通

用石韋車前子等分水煎去滓服

又方。治小便不通。及脬轉。梁上塵。去烟遠者。一撮水調服。十便良方子苓散。治小兒壅熱。小便赤澀不通。水道中澀。痛不可忍。

子苓

冬葵子

車前子

茅根

剉。已上各一兩

滑石 二兩

右件藥搗羅為散。每服一錢。以水一小盞煎至六分去滓。不計時候。量兒大小以意分減服之。

大青散。治小兒臟腑壅熱。心神煩躁。小便赤澀不通。

大青

川升麻

蘧麥

黃芩

甘草 炙微赤剉。已上各半兩

川大黃

三分。剉微炒

川朴消 三分

滑石 三分

右件藥搗細羅為散。每服不計時候。以溫水調下半錢。看兒大小以意加減。

朱砂散。治小兒心藏熱盛。煩躁不安。小便赤澀不通。

朱砂 細研

鉛白霜 細研

犀角屑

黃芩

車前子

甘草 炙微赤剉。已上各一分。

滑石 半兩細研

川朴硝 半兩

右件藥搗細羅為散。入研了藥令勻。不計時候煎苦竹葉湯調下半錢。看兒大小。以意加減。

又方

冬葵子 三分

滑石 三分細研 梁上塵 半兩

黃芩 半兩

甘草 半兩炙微赤剉

右件藥搗細羅為散。不計時候煎葱白燈心湯調下半錢。量兒大小。以意加減。

又方

生地黄汁 一合 牛蒡葉汁 一合 蜜 一合

右件藥相和令勻。每服一合。調下滑石細末半錢。臨時看兒大小。加減服之。

滑石散。治小兒熱極。小便赤澀不通。尿輒大啼。水道中痛。

滑石 一兩

子苓 半兩

冬葵子 三分

車前子

赤茯苓 半兩

木通 三分剉

右件藥搗麤羅為散。每服一錢。以水一小盞煎至五分。去滓不計時候。量兒大小。分減溫服。

車前子散。治小兒小便赤澀。服藥即通。無藥即澀。宜服。

車前子 一兩

子苓 一兩

滑石 二兩

木通 三分剉

赤茯苓 一兩

琥珀 一兩

甘草 半兩。炙微赤剉。

右件藥搗麤羅為散。每服一錢。以水一小盞煎至五分。去滓不計時候。量兒大小。分減溫服。

治小兒小便赤澀不通。宜服此方。

滑石 二兩

木通 一兩

葵子 一合

右件藥麤羅為散。每服一錢。以水一小盞煎至五分。去滓不計時候。量兒大小。分減溫服。

張渙醫方妙選葵石散。治小兒小便不通。悶亂。

葵根 一握

滑石

木通 各一兩

牽牛子 半兩炒

右件搗為麤末。每服一錢。以水一大盞。入燈心葱白各少許。煎六分。

去滓放溫服。乳前食。

朱砂丹。治小兒心神煩燥。小便赤不通。

朱砂 一兩令研細

滑石 半兩

犀角屑

黃芩 一分

車前子 一分

甘草 一分

右件藥搗羅為散。入朱砂同拌勻。每服半錢。煎竹葉湯調下。食前。張銳雞峯方治小便不通。

用大蒜不以多少研爛。攤在紙上。臍下貼之。

聚寶方治小便不通。

獨顆大蒜 一枚用頭

鹽花 少許

山梔子仁 三七枚

右三味搗爛。攤紙花子上貼臍。良久通。未間。更塗陰囊上立通。

莊氏家傳治小便不通。

用白礬為末。每服一錢。溫漿水調下。

長沙醫者丁特發傳石韋散。治小兒小便不通。

石韋 去皮

瞿麥

滑石

甘草 各一兩

燈心 一小把

右為末。每服一錢。水八分。小麥一百粒。同煎五分。去滓溫服。量兒大。

小加減

湯民望嬰孩妙訣。凡此候。皆因心經不順。或伏熱。或驚起心火上炎。不降濟腎水。故使小便不通。溺血者。由膀胱熱極故也。家傳木通散方。治小便不通腹痛。

木通 一兩

牽牛子 半兩 炒
滑石 一兩

右為麤末。燈心葱白煎去滓。大小以意加減服。

王璆百一選方。趙使君云。其子年十餘歲。因小遺。為犬所驚。當時雖無事。後旬日忽小便不通。大便初覺自利。後復如常。率半月餘方一小遺。飲食起居間皆無所苦。亦無腹脹肢體腫滿之患。凡服通利水葷。治淋澀藥。並不効。移書問一醫。姓劉。忘其名。寄三方來。第一方用地骨皮一兩。防風半兩。甘草一分。為細末。煎麥門冬湯調下。不四五日即通。服之不已。即三日一通。終劑已兩日一通矣。再服第二方。用青皮。陳皮。通草之類。不能盡記。數服即平愈。第三方不曾用也。

演山省翁活幼口議。犀灰散。治小兒心經虛熱。小便澀痛。筒管內疼。不可忍者。宜服此方。

蠶蛻紙 不拘多少

右燒留性。為未入麪。每服半錢七。燈心湯調。

曾世榮活幼心書薑豉餅。治久因濕氣中於膀胱。復為風邪客熱攻激。小便不利。臍凸腹脹。食減作痛。先投解表散。

生薑 一兩碎切 生葱 五莖切碎 豆豉 七錢潤者 生鹽 一錢

生蒜 二箇切碎 酒酵糟 一燈盞。無。以好酒代 穿山甲 同上製

右件入石鉢內同杵爛。捻作餅子二寸闊。用微火烘熱。帶溫貼臍上。外以絹帕兜住。如冷。依前法換帶溫者貼之。或再以火畧烘煖亦好。

永樂大典卷之一千三十三

重錄總校官侍郎臣高拱

學士臣瞿景淳

分校官洗馬臣林爌

書寫生員臣趙繼祖

圈點監生臣馬承志

臣尼三顧



